

海

虞

詩

話

海虞詩話卷三

單學傅師白輯

歸大令鴻字既垣號于磐右直上舍子惺崖宮詹猶子康熙四十二年進士榜姓張上海籍復姓歸知西華縣事報最內擢以通案停選少貧仕後如故性尤坦直人皆稱爲長者贈王石谷云北苑南宮迹已陳石田文敏筆須真天遺王老非無意欲使山川景一新恰得石谷身分

楊畫師晉字子鶴號西亭石谷高弟以寫牛擅名仿石谷山水亦神肖君以畫邵青門以詩葉佩蔥以度曲稱西郊三絕君畫名既盛四方士大夫持縑幣求者皆滿意而去後生末學沾句

餘潤以贖本求款亦欣然題署其通懷樂易如此題單檀谷行
樂圖云靄靄雲山渺渺湖扁舟相值互相呼等閒不識君橋梓
錯認漁樵問答圖又題元人張大頰墨牡丹云筆底分明一畫
禪洛陽花色動雲煙古人不與春同去流落人間二百年皆新
俊自賞也

孫正舍爵昌字二酉予見其蜀游草聊存草稿本其尊人名廷
璋字麗公曾爲什邡令入蜀乃省親也經王西澗先生點竄極
佳瞿塘峽云瞿塘三峽路迴旋激石奔衝破曉煙樹影似依雲
冉冉鳥聲微和水濺濺孤舟深澗難窺月兩岸高峯欲蔽天自
顧風塵慚俗客不期山水有因緣送平崑如歸里云騷屑風光

百感生惻惻祖帳送君行那堪急管陽關唱又聽離亭杜宇鳴
明日各天今夜酒頻年聚首故鄉情如何蜀道同爲客我獨依
然滯錦城又江水滔滔繞別腸秋風秋雨慘離觴三年同事心
多感萬里先歸迹可傷世路崎嶇看劍關人情險阻識瞿塘到
家莫憶羈人事只說西川似故鄉次張步軒青門旅懷韻云去
鄉那易愜襟期兀坐空齋動遠思露浥花香侵硯冷雲籠槐影
過窗遲十千美酒春寒費百二雄關旅夢知憶得故園三徑好
鶯囀高柳傍疏籬又長吟獨倚夕陽樓纔送春歸又麥秋蕉鹿
忽驚三載夢蘊蘊空憶五湖舟賸憐歲月蹉跎去聊逐風塵汗
漫游是處蕭然留襍被關心桂玉可紓愁餘如簡友云吳楚關

河家萬里巴渝煙雨客三年送陸浣江之巖云雲連姑射征衣
冷月落汾陰去夢遲皆爽朗不羣子夢遶字中伯乾隆七年進
士著讀易揆方十卷

張大令淵字斗南知蒲城縣事少年筮仕有威望時聖祖西巡
大吏檄治馳道君以地非孔道不宜先事騷動辭脅以威竟不
應大吏因讌屬官卒謂君曰聞江鄉多木棉未之見也出紙扇
令寫其狀君卽泚筆爲二本令更題之君立成四句曰盡道木
棉好還愁地不肥關中百萬戶卒歲半無衣大吏嗟諷良久欲
薦之而君遽得病卒於任

單文學謨字讓之醇雅有尺度送縣令陳木菴先生奉召入京

云空羣才望重幽燕綰綬南沙果卓然心映一輪虞嶺月胸涵
千頃尙湖煙閣閣戴德歌聲徧廊廟須才側席延百里化行剛
兩月不煩考績俟三年翰苑分曹莅海陬使君來暮著歌謳正
須撫卹除民瘼忽被傳宣入帝州羣望屬車思化澤遠瞻飛蓋
想宏猷他時宣室陳何事請道瘡痕賴煥休可謂贈言有體矣

柳南隨筆江右陳木菴守創居官清介天下第一雍正中以罪
誤罷倉場侍郎先是康熙六十一年知常熟縣未及兩月行取
入京去縣時合邑罷市樂留至以石塞署門不聽去得民如此又蘇臺覽古云闔閭霸業已塵

埃遺迹猶存此一臺因信佞臣亡社稷非關敵國有賢才花羞
西子隨流去濤怒夫差逐日來句踐再傳年亦促越王樓下盡
蒿萊

馬畫師元馭字扶義號天虞山人縱酒自豪予家舊藏其桃花
八哥一軸懸於壁屢爲貓攫八哥而裂先大父俊明公厭之竟
爲友人攜去虞山畫志錄扶義自題絕句云碧雨千絲灞岸低
赤欄橋畔畫樓西飛來枝上雙鸚鵡不到濃陰不肯曉豈卽此
幅耶惜予幼未能悉也王柳南稱其詠梅有無風有月尋常事
難得人閒對此花蓋馮鈍吟有句云若教帶影和香賞難得無
風有月時正反其意耳

黃廣文曾憲字式度由恩貢秉鐸青陽品端學醇乾隆中嘗作
翠華重幸詩獻之行在共五律十六章予得其稿本因錄二章
云孝治光華大巡方載幸南羣黎望歲切溥海洽恩覃迎輦花

開茂知時雨降甘嚮風懷宇下胞與德俱涵又鳳輦出慈宮花
光禁苑東青陽融淑景彩仗拂輕風方物盤餐裏春色笑中
至尊能孝養嵩祝普天同唐人應制風格覺未遠也

譚布衣位坤字淡菴康熙丁酉六月望夕夢登台嶺俯瞰江流
口占萬壑一聯云云醒而書諸壁見者謂有神助以淡菴不甚
習於詩也淡菴因是足成律體而王西澗陳亦韓諸君和者且
二十家裝演成卷其詩云悅入仙源汗漫游溪山重疊景偏幽
躍爓曉冷雲煙嶂舞鶴獅開月露秋萬壑松濤連海氣一天星
斗映江流誰知縹緲蓬壺勝不限塵寰便可求事過百年詩已
久佚迨道光庚寅玄孫若溪炳喜趙璧之返而又徵和於士林

得詩益多王雲開朝棟者露消詩老七世孫也忽出仙山松吼
圖貽若溪乃當時露消爲淡菴所繪由是復成合璧若溪因裒
爲夢吟唱和集先是五年元夕若溪在滬城白渡時南漕航海
舟檣燈火蔽江天漢星明如晝曾占一聯云萬樹銀花開白渡
一天星斗浸黃流若合淡菴夢吟句意爲返璧先兆亦一奇也
若溪今隱於吏昨於市中得吾家如同公圖像手卷有魏浣初
文及王鐸文震孟夏曰瑚三人詩而佚其圖予素不識若溪而
若溪遽託友人歸之於予此雖雲開風義所感而若溪之高雅
亦足表著矣他日以之徵詩於士林不又成韻事耶

席舍人整字寶箴號景溪雍正二年舉人榜姓吳官內閣中書

舍人七八年以昆季凋零傷懷解組纔古人強仕之年耳詩主
渾灑流轉大略得力於韓蘇二家錄其讀書謠一篇可知其宗
尚也詩曰平生見書眼始明一卷挾我晴川行雲容浮空天照
綠白石鑿鑿蒼藻橫俗客絕馳一掃迹有耳不聞人語聲縹緲
閣淡籤軸脫汗漬指摺多故情遺編乍覩矜祕獲側身入裏探
菁英留傳可愛孰爲最司馬杜韓何崢嶸匠心獨運不諧媚澹
泊中自含光品矯然鸞鳳下天表變眩倏忽馳颯颯濠濮荒唐
超迹象江湘興比據忠貞相如逸才賈茂思二子異調雄西京
其餘戢香排雲笈暮諷晨吟供掇拾仙爪恰從痒處爬躍鱗肯
作枯時泣飯釘簇攢何足豪字離句死黏難牢筋弛節散肉堆

染鬢眉低下尻空高世所競傳難免此當筵籠袖愁腥臊有時
奮筆徑批抹直恐故鬼空中號丹鉛少日紛滿前中歲患眩嬾
只眠身倚隱囊卷在手臥遊亦得窮林泉古經深嚴辭典重每
索章句神凜然專勤要須拜且讀老歎日月同奔川君爲太倉
吳梅村外孫蓋亦不屑勾其膏馥孫名世昌字子侃乾隆六十
年舉人詩文喜爲奇警語惜慳於壽故未盡醕又君叔祖漢庭
名前席八歲能詩值暮雪父命賦詩應聲云光搖窗不夜風定
樹飛花亦官內閣中書並附記之

丁大令斌字維翰雍正五年進士知休甯縣嘗見上官而袖中
忽遺紙牌博具幾以此落職賴蔣文恪公是其門人居閒得解

人咸笑之其時吏尙操切君以古法化導旋因命案罷官青陽
精舍云山行阻雨憩僧家竹几鑪香且試茶不道雨中春亦好
數聲清磬一林花人競傳之又菜花云看花人不到蜂蝶自爲
忙

張上舍朝續字東巖雍正初葺步道巷祖居建照曠閣開招陳
亦韓司業輩爲詩酒會閩人張遠主其家嘗以事爲當事所拘
作詩有蛟入阱中皆似蚓鶴歸籠內不如鷗之句五古絕類香
山閒窗漫筆云北鄰喪其夫南鄰死其雛听宵哭泣鬧我感與
之俱何人能自保奄忽涉迷途怱怱眠復起誰知歲月徂富貴
如桎梏能令心骨枯須臾自凋謝不見秋井梧又嘗聞漢四皓

高隱商山陬清風揚萬古邈焉真寡儔今人尙碌碌古人好悠
悠歎彼碌碌者但知爲身謀此身非我身何必空煩憂鶯花當
陽春風月宜清秋誰與同盟者溪中鳧與鷗其後人藏書日多
且彙刻行世嘉慶廿五年照曠閣燬於火好古之士咸爲累歎
云

吳文學袁維字鏡池自休甯遷吾邑久而入籍陳見復門人也
游京師改名鵠善鼓琴文好奇詭馳驟跌宕自雄客死豐潤蘇
園仲梓其詩於苔岑集盤山紀遊十首自矜奇作茲錄其一云
山半選奇峯雲爲開生面雲山互吞吐嘉名得僧院名雲寺雨氣
忽而合霄壤迷一片似海茫茫長波激飛箭又疑元氣胎陰

陽未相嬾游心天地初同人而異撰

江文學藻字揆庭父飛濤兼工詩畫海虞詩苑國朝別裁皆載
其詩揆庭與聞王西澗陳見復王良齋汪西京素風僧諸人談
論而所作主於鮮潤故墨露齋詩距今六七十年儼然新盛沈
澗研麝煤而書碧荷葉也七言佳聯如和汪西京云蘭草迴環
春水岸桃花掩映夕陽樓中秋云頓覺瑤宮從地起恍疑銀漢
接檐流送春云嫩陰釀雨遮芳徑暝色和愁赴畫樓夏日云俗
子似蠅驅不去故人如雨望難來北山道中云林花歷亂曉黃
鳥坡草萋迷散白羊又題桐陰小照五古一首亦清雅可喜云
境靜息塵機高梧墮空翠幽人愛秋影倚石此遐寄獨坐澹忘

言小奚抱書至

徐處士彝字儉齋所著東臯小集一卷今在蘇耐寒家與象明

按亦姓徐

云兩人懷抱合爲羣譜並南州豈足云今古清狂惟有我

乾坤慙直更無君風前共釣江頭雪雨後同耕隴上雲造物若
還容二老尙期終日醉醺醺蓋放逸士也冬日病起云離衾先
怯冷向火始忘寒甲辰紀風潮之異云屋瓦飛同鳥人尸泛似
萍寫懷云愁催白髮三千丈酒借朱顏一二時皆爽健

須處士敏字敏道著偶然集一卷蘇臺遠眺云何處堪憑眺姑
蘇有舊臺吳煙凝樹合越日照山開花逐西施去潮隨伍相來
望中三百里極目思悠哉題張錦川小照云地僻心逾遠心閒

地更偏孤桐明月下疏竹晚風前雲影皆文翰泉聲卽管絃與
來還脫帽無乃是張顛觀菊云晚節憑誰共寒香爲我留新秋
臥疾云萬事淒涼花落後一身顛顛葉飛初懷素風和尚云上
方月好頻相憶山徑雲深未易尋用唐天然湊拍尤妙

姚布衣俊字俊求號秋谷喜交詩酒之士若王東澂顧竹坡張
運南輩皆與往來過從酣嬉無厭倦三月十四日馬東白招同
人集存素堂云踏青爲赴高人約觴詠今朝樂事兼白筍朱櫻
新薦席黃蜂紫燕競穿簾雲連嫩綠遮茅屋風送殘紅點帽檐
游衍何妨歸路晚醉餘勿問挂銀蟾

鮑畫師楷字筠菴號仙根自題戲蝶圖云衣彩爭花色低飛故

向人江南芳草地同過夢中春
郊蘭坡畫志錄此云詩筆娟秀
恰稱其畫

許布衣廷錄號適齋居海上能詩畫著有東野軒集予獨愛其
雪後看虞山云蜂頭積雪白如銀樹杪還疑糝玉墜好景飽看
逾十日陰山飛落尚湖濱末句奇闢得未曾有

陳布衣典字玉先居歸市善寫水墨牡丹無子踉蹌作闌怨寄
意人競傳其一聯云一春羞見雙飛燕五漏愁聽再唱雞

王布衣嶼字杉谷號西疇居徐市善琴得畫法於邱嶼雪

名園石谷

同時詩有清致如畫豈求形似詩須見性靈又交緣易合終難合

事每無心若有心宿業都消并戒酒秋陽尚烈最宜瓜皆超豁

瞿文學勳字元功秋暮病起云颯颯西風冷暮秋病餘三徑策
筇遊芙蓉零落黃花瘦又是人間一種愁聞笛云阿誰橫笛與
徧幽吹微風前落葉秋可識隔林斜照裏有人愁絕倚南樓風
義去唐未遠予選大觀集時得其鈔本原稿巨册今無追討處
并集名亦忘之矣

許布衣淳字古初著有吟亭詩稿工畫小竹山巔水湄時理遊
屐使酒傲物所與遊多山僧市隱著述頗多不自收檢裒同輩
人詩爲思舊集其一也中年喪耦挈兒教授送梅菴上人移錫
西林云三峯分法乳飛錫度西林水曲開初地樓高落梵音風
塵知我老心事爲君深試問中宵月淒清照獨吟此亦言發乎

情者

蔣工部柝字廣蔭九歲能文雍正八年進士官工部都水司主事壽陸次公九十云千尺蒼官百尺樓人間勝地卽丹邱冰桃雪藕稱觴處願借松鍼作壽籌結語新切以次公家有十五松山房也

張處士道淙字家相號未齋就菴子也遊陳亦韓之門其父執陸敕先貽典遺集剝蝕爲之梓以行世柳南因得收諸詩苑未齋著有雪溪吟一卷亦頗完善用和六兄買牡丹歸植園中賦詩索和次韻云春行擔得一枝枝正是天紅欲放時新院落中添麗色小闌干外挹芳姿半寒半暖依青瑣微雨微風障紫絲

好與徐熙供彩筆晴窗澹染莫教遲辭致不減初春楊柳也題
畫六言如蠶豆花云不愛羣葩芳豔爲憐佳實紛披待得薰風
垂角看看賣盡新絲白菊云月裏霓裳罷舞風前鶴筆新裁不
是一聲剝啄都忘送酒人來皆將到恰好處

僧德立字鶴臞號西池余嘗見其草書已臻能品亦善畫菜主
持三峯寺著有藕華園詩山居云何年到雪溪便住峴山西夜
臥北窗月曉聞南郭雞落花紅雨亂新竹綠雲齊時見幽栖鳥
同枝相應啼風味絕類唐賢又家傍長江六月寒七字亦佳

僧德元字訥園長洲人余見其五峯草堂詩選鈔本知其卓錫
虞山者有年別裁集所選二律不在此本蓋自有來鶴堂全集

也尙湖云西風揚素波秋意集前浦岸暝煙乍浮橋明月初吐
蒹葭隱亂帆菱花散柔櫓光搖宿鷺驚浪拍潛蛟怒遠岫浴遙
青荒村貼環堵寥天鴈行滅淺渚魚罾聚客子泛孤舟蕭蕭感
風土移居用陶公韻云大塊如旅亭何用卜安宅修短齊春花
古今一晨夕蓬廬不甚廣聊以息形役芳徑羅杞菊小窗列几
席曠懷任所之無心感疇昔往來二三子妙理相與析課樵者
種松云闢徑當繞溪種松須傍石莓苔敷本根雨露滋潤澤任
意隨橫斜立身宜挺直老幹欲凌雲孫枝如卓戟上爲蚪龍蟠
下許精靈宅天風散蒼翠地氣結琥珀抱此歲寒節以謝棟樑
擇過王煙客先生西田云名園細路自孤城花戶紆迴島嶼青

摩詰畫圖開竹里右軍書法記蘭亭

屋壁間多董文敏書

橫溪松老龍生

甲繞屋梅殘鶴墮翎惆悵烏衣雙燕子呢喃絮語木香屏佳聯
如石潭洗鉢僧何處竹院題詩客又來碧水池塘花正滿綠楊
樓閣燕初飛細玩選本絕似詩歸中所選摩詰諸家詩造詣深
邃非泛然也

俞道士松居五岳樓康熙中高安陳公來宰吾邑多美政未幾
赴內召去士大夫皆作去思詩於一二年之後瞿幽穀觀光彙
而刻之題曰琴川餘韻作者約二百人余獨愛松一絕閒徐有
味云留蔭甘棠尙可思賢侯恩徧客春時於今樵牧謳吟徧廢
劣山人亦賦詩

張節婦褚氏張世恆妻也二十夫亡通書達禮多吟詠臨終二
絕傳誦於時云待死光陰日抵年關心菽水百憂煎高空不改
蒼蒼色獨有寒門墜卻天破鏡歌殘夢亦愁此身久已視浮漚
黃泉有路津休問收拾歸裝趁柏舟陳祖范采入昭文縣志

海虞詩話卷四

單學傅師白輯

王侍御峻字次山號良齋雍正二年進士以編修歷典浙江貴州雲南鄉試拜御史三日卽抗疏劾其臺長直聲震於烏府少貧甚借書而讀日受人訾警後登清要不名一錢人皆重其操守歸田後主講紫陽書院賞識皆成大器詩復清爽勁直良齋詩文集乃蘇城蔣誦先槩所鐫錄其沅陵道中賦筒車一篇以資考索正以餘詩不待是編復述也序云筒車桔槔類也揉木爲輪內外兩層圓徑丈餘兩面厚尺餘中聯直木爲間架編竹片三十餘方釘四周截竹爲筒斜縛其間前後植木以安軸置

輪水中壅上流之水使急下激輪旋轉岸上架木溝受筒水入
大竹中注於田不勞人力而晝夜不息楚南人名爲筒車於沅
陵麻溪中見之蓋急溜用此事逸而功倍也詩云古來有水碓
江南惟水車筒車之狀今始見團團非鴉亦非蛇用東坡水車詩風輪
圓徑一丈外編竹爲版筒交加驚湍壅使怒奔赴左右旋轉聲
咿啞銀河倒瀉飛瀑灑坐使高亢成卑窪木牛流馬制莫考楚
人小智亦堪誇漢陰丈人若見此不知何限含悲嗟結語卽用
楚事兼露本色固知五七言緣乎性情不可強也

李文學崙發字宿淵號青來乾隆七年年已七十猶游幕浙西
王勿藥繼良序其詩謂得天地之春氣隨物生情長勢其人則

老其文則少予愛其慰友云得喪正難先事料是非奚待後時
思冬日渡江云木葉彫時千嶂削年華老去萬緣輕山居云已
忘春至花爭豔不覺年增鬢自斑歸途云再過溪山如舊識乍
逢鹿豕是新知皆可吟諷三潭印月一律尤見工穩細切云天
邊素影一齊收鑿石三章竇似毬人巧盡時能合照容光到處
恰分流風輕波細層層出璧合珠聯顆顆浮月姊不愁形影隻
寒潭添得十分秋

劉處士天立字惟中罍里村人卽刊宋玉才詩名文思字吾村
秀才之祖也歷山遺稿潘芭涓行草書之陳桂森序之亦吾村
所刊春感云煙鎖茅檐雨打窗閉門空吠隔籬尫情牽春樹連

吳苑夢斷朝雲暗楚江照鏡已驚鸞舞隻捲簾忍見燕飛雙
將死別生離淚重釀梨花酒一缸和雲瞻自壽有晚徑黃花和
雨立句立字頗奇題閑收圖有谷口花深飲上流句亦佳

屈文學琛字獻之號青谿居士家貧意曠晚遊粵東諸郡著可
怡集春日登山有懷壽慈廣西云驅馬出西郭陟彼錦峯巔山
氣日以佳羣鳥鳴樹間景物隨時轉之子去不還矯首更西望
滿目惟雲煙青松落顏色白石咽流泉何時遠道來家山同振
鞭寄懷東陽云拂水巖高落日橫每依南斗望龍城鳥因巢定
知迴翅人爲飢驅忘遠程三載傷離兒女意百年歡聚弟兄情

刀環聞有來春約好整歸鞍聽鹿鳴

原註古詩鹿鳴思野
草喻兄弟之歡聚

六十

自壽云壯志擊壺猶欲碎，衰年運甕豈能便。書懷云濁酒沾唇，原占福殘書著手，便忘愁。楓落云適經霜染成霞，幄卻被風吹作地衣，皆集中擅勝作也。

趙舍人森原名貴樸，字素存，號再白。雍正十三年舉人，官內閣中書。貧而豪華，裝與人共之。賈文長安大書榜其壁曰：聖賢豪傑在我不干命，事功名富貴由命不干我事。其爽豁如此。袁簡齋以報罷鴻詞科，困頓招而飲食之，後袁常耿耿弗釋。小倉山房文集載其事。詩能爲大篇，檄兩百韻，由玉川望少陵，惜長不能錄。滕王閣晚泊云：一序當年重此都，至今飛閣煥瑤圖。江山自得才人助，星斗還看劍氣俱。不覺低回成異代，可憐輕薄笑。

吾徒拂衣日暮扁舟去風色連橋興未孤真州朝陽樓云萬重
山去圍如障千里江來折到樓鄱陽舟次望匡廬云倒影不教
湖掃黛排空惟有鳥衝煙蓋皆趨少陵老健一格吾邑詩人中
當推爲嚙嚼宿將也

黃布衣大復字我克號勿非性傲志潔事嗣父

康熙丙子舉
人名朝元母

以孝聞古文書法名動公卿間終寥落以死其表兄蔣元康侯
搜遺詩序而梓之廿四橋云嗚咽荒宮水宮橋廿四分玉人曾
立處漁子釣寒雲月色自如舊簫聲杳不聞蒼涼空引恨滿眼
古時墳平山堂云太守堂開處高岡占勝多山容浮遠黛江色
展輕羅賓客皆詩酒烟霞入嘯歌我來間眺望風雅託誰何皆

清婉近唐餘如寫憂云骨肉盡爲山下土形骸猶戀世間塵屋
破尙輸螞有設體羸轉羨鶴能肥七夕云人閒秋恨逾春恨天
上新歡卽舊歡贈李紫函鍊師云偶藏靈藥飛紅鴿雅愛臨池
畜白鵝又秋興有蟋蟀當盆占繡旗及風作雌聲嘯孟婆一語
殊新特

金文學鴻字紹聞號裕齋自北潢移居南范幼少師承力學自
奮吾鄉秀士俱出門下范鈞閒稱之爲傑士賦屋脊上蔥云北
地曾傳徧嶺栽屋顛鬱鬱氣尤佳高舒龍爪擎雲動近傍鴟頭
映日排畢竟瓦松難作伴固應門莠不堪儕中通外直含青翠
據極何愁霧雨埋與致自覺高逸子大椿亦能詩

張處士昨字錦川向有其鐫本詩已失去記一聯云詩爭獨捷
敲銅鉢酒戰羣雄倒玉山蓋贈友作也

王刺史琛字匪石號古香良齋從父也喜寫梅花以監生與修
一統志書成授四川內江令遷知廣西永康州多政績年八十
乞休著有愛景堂集四卷予未之見僅從畫志錄人日詩云流
光逐客不遑巡瑞英驚添七葉新澗底雪融泉眼活屋頭禽喚
柳腰伸三年汗漫傷春物一卷叢殘伴病身憶寄草堂詩句在
梅花欲笑未歸人畫意詩情雅人深致子陸禔亦能詩

張明經仁美字遷里號靜谷子敦均敦培先後以進士歷官御
史居賓湯門內緣溪有古榆數株今所謂榆樹下張者也靜谷

喜藏書詞辨綺藻寶閒齋詩集四卷善說實事頗得中和之氣

喜次兒敦均得中經元云盛衰理循環否泰運更迭天公憐我

窮回春化寒雪仲子夙穎慧書香紹前哲弱冠試鄉闈戰勝能

自決乘茲八月槎直入蛟龍穴海藏多明珠猛銳窮搜抉高擎

出鯨波晶光九霄澈欣看穎脫囊禮經冠英傑屈蛟經雷伸一

朝頭角凸家聲近凋零茲稍振前烈譬猶楊已枯迎霜又萌蘖

滿城桃李穠同時競頡頏余本山中人嫩隨人世熱泉石久結

盟安分守愚拙居雖近城市可玩不可藝性比九秋花芳心蘊

孤子階前茁新芽非不顧而悅庶乎抱香老不改淩霜節杭州

小有天園云行庭不見園園在屋之側徐徐走崎嶇漸漸表奇

特樓閣入雲連臺榭向天塞綠瓦排魚鱗朱檐展鵬翼十步五
步閒長亭短亭逼時或尙清幽間亦務雕飾不惟美輪奐抑且
善培植古木挺蒼秀時花巧羅織紅綻樹若肥草豐徑轉仄池
水曲如環石橋渡頗直鶯燕窺林鳴鯉魴藉萍匿飛躍任天機
經營憊人力高峯擁其南平湖漾其北豪發登臨興快覩山水
色乾坤了無障俯仰惟所得曠朗移我情會心在沈默

陶布衣漢字玉章號亦村詩有破閒草潘芭洲識之於晚年訝
其眉宇間有精悍之色後乃知其善於槍槩有二子務農色養
蔗境優游題且豁大師訪道圖云松秀猶多色山寒未盡空亂
雲泉響處古徑月明中結社誰元亮聯吟定已公拈花應一笑

去住本相同

許刺史朝字光庭號紅橋家東塘墅乾隆四年進士知廣西懷遠縣遷山東濟南府通判駐德州謁鄉賢祠黜明嚴嵩黨楊順木主順害沈鍊父子者也衆踴之仕至知州著有文集其紅橋詩集明淨秀潔青田韓湘巖錫胙會稽茹三樵敦和選千餘首爲三卷每卷後附摘七言數十聯未有鐫本錄其呈陳體齋師云去年三月識師面袖中羔鴈行囊詩今年三月師移寓筆牀硯匣紛攜持春風杖履日陪坐步趨籍湜忘形疲自來仇池通小有詩人往往貪如癡眼前風物足云樂何用慨歎長安棋况今天閭開九達揚玄只可覆醬瓿臺端羣公多有道陰翳解駘

雲霧披蝨蝨駞驢負蟹走一疏兩疏心出奇景汲追匡振飢餓
不爾何以酬心期心期胡爲不謀合聖明在上揚鬚眉東坡素
號曠達者命宮區區較退之吾師結廬託潯水屈指六載遠湘
灘翰林聲華今柏府忠言罄吐蠶抽絲鷹角能觸口能咋但可
張膽靡不爲宣武城南塵似海朝天馳馬勞敢辭我行東游訪
津水去去特爲尋心知心知渺渺不可必瓣香畢竟歸吾師不
波船有序云懷署荒涼特甚官廨無可坐臥者予構屋三楹以
供吟嘯寬闊如船顏之曰不波詩以落之君不見張思光舟居
非水陸非屋一身水陸兩無處千古無偶君其獨我師其意云
如何作屋如船名不波間架無多寬書畫紛紛羅有酒可酌詩

可哦公餘歲月從中過世境安閒能有幾萬頃洪濤襲時起龍
驤萬斛一鴻毛漁艇掀舞如芥子舟師齊喚渡不得性命一船
管蒯耳謝安雅量人所無持此安歸尙爾爾危處思安安更安
安時莫忘危時難聖賢有訓在居易我行我止安其天此意非
曠達行險嗟徒然世人妄想空憂煎一葦思渡蓬萊嶺海水山
立波漫漫波漫漫愁無邊何如平地安無瀾請君坐我不波船
斗河行云斗河之閘十有五重重壑水如牆堵舟師涉水水沒
踝水下巖根見臥虎前閘開後閘閉輕舟如刀石如礪斗夫重
滿上下忙水則自涸船自濟官程我同星火急斗水都教吸船
底寸鱗不待江湖寬杯水芥舟行自利笑他賈舶銜尾停石白

貼沙中載米一宿又再宿陸處恰非屋人行偏遲我獨速上斗
猶如轉轆轤下斗更似離弦鏃我今過斗不知難要知斗水常
年乾無水時多有水少斗夫蓄洩徒供官當今聖人下明詔萬
金頒帑來邊徼相度親勞大吏賢築隄壘石營深澳會待官民
一例行蕩蕩恩波行浩浩詩之活潑轉動殆不減眉山也佳聯
如貧共青山留瘦骨危同黃葉戰清秋一粟浮天翻駭浪萬山
同我撼洪濤衣上風塵經歲月指頭花草自春秋藤蟠老屋扶
危壁雲擁寒山補斷厓樹老獨當風力勁庭空偏受月光多客
路飛塵消眼角農夫喜色上眉尖連山野竹香成陣臨水孤城
矮似牆聞道客來愁束帶偶翻書去便開眉陶穴噴煙衝嶺去

漁船打槳蔽江來漫寫靡音追北里肯隨假面弄西涼牛後難
防燒尾火馬前還怕打頭風乘時得雨龍爭躍無意冲霄鶴不
飛此類美不勝摘大約放翁青邱之間可參一坐隨園亦曾摘
句入詩話

邵太史齊燕字荀慈號叔六乾隆七年進士授編修兄弟五人
先後三翰林一中書一附貢而君尤以文譽著貌甚清古豐下
銳上首微窪如仰釜眉目疏秀短視章草入晉人室據案作書
望若隱几臥者嚴冬喜脫屨踐鑪起卽亟取躡往往兩屨不同
旁觀匿笑自覺之亦自笑已且復然好獎後學主講毘陵龍城
書院既歿士有篤於心喪者駢體文名重海內玉芝堂集至今

膾炙人口詩亦清夷雅妙茲錄其宿遷道中望黃河用少陵漢
陂行韻云我聞黃河之水天下奇浩蕩勢欲無湖陂渾流九曲
走沙礫急浪千層翻琉璃下流歸海自淮入過此茫茫鄉思集
高樓粉堞是淮城一葦杭之跂可及昔經鍾吾帆不開窈窕畫
晦飛黃埃登隄一窺沸鼎勢轉眼七載今重來重上高隄境難
測眼亂晴光更頻拭但覺長流波浪平那知昨日風雲黑隔河
斜晒江上山翠影下墮淪漣間安得清風送我到山下亂踏黃
葉行鄉關世人役役盤中珠孟門嶄絕方爭趨乘颿破浪豈不
壯背家離鄉得已無吾身飄颻隨所至出岫閒雲本無意及今
不還當謂何人生行路多風波君年三十六卽退居林下此詩

已見其端

葉上舍上葉字秋亭著遠遊草二卷玩其詩語蓋甯波人而流
寓吾邑者所居曰華川閣實在華匯足迹所至殆遍六字皆據
集可考詩格清爽七律以高朗爲主題硤石云硤石如屏插翠
螺舉頭一望盡嵯峨臺名講學遺經少地爲要盟折戟多赤磧
直連秦隴阪黃流斜界晉山河書生略曉圍棋勢肯作尋常策
馬過潼關云吳儂匹馬入關來攬取山河勢壯哉分陝東西真
扼要二陵風雨劇餘哀波騰砥柱蛟門隘劍削金墉鳥道開磐
石果成天險設咸京何事有蒿萊又東林除夕云客裏行蹤山
北向江干歸意鴈南飛梅林除夕云坐隅有客惟催債年例今

宵定要詩大梁除夕云送窮須送無還地除夕難除不了緣三
聯可謂味美於回矣

吳文學思勉字虛谷休甯人僑寓吾邑應商籍試入錢塘縣學
全椒金兆燕跋其詩謂五古寢食漢魏得其神髓良然擬古云
黃鵠志千里良驥任馳驅萬物各有役誰能安久居望舒戒僕
馭羲和奔前途鏘鏘鳴玉佩結束歷天衢朝飲瀛海濱暮宿蓬
山隅窮通何足念太息無乃愚好女守閨中好男在征車又魚
涸思得水鳥倦思依枝百年苦日短奄忽若朝曦人生貴令名
安可失良時立功苟不早奉養無乃遲所愧爲人子使親長忍
飢豈無黑貂裘我友寒無衣朝露溘然至安用泉刀爲何況愛

惜費常爲達者嗤又秋風亦云厲木葉鳴蕭蕭念我素心人高
舉冲雲霄清姿比晴漪綠髮何飄颻慷慨不得見使我心搖搖
登高望遠道遠道嗟迢迢良晤未可知吾行采瓊瑤采之遺所
思所思不可招又鸞鷲翔天闕威鳳鳴高岡一展凌霄羽熠熠
生輝光人生天地間特達擬圭璋如何守恆拙偃蹇無文章嗟
彼豪華子高會陳樂方盤書看四角不知從中央雞鳴已風雨
松柏凋微霜丈夫非自立身名安得彰願言保修期終古以爲
望往聯如孤鐘催晚色歸路背斜陽高情涼俗少知己異鄉多
朝日穿林出孤雲逐鳥流皆高逸也

吳文學思敏字克農入錢塘學虛谷之弟於吾竹橋師爲叔深

相契愛秀州曉發云滿城雞犬亂知是五更時缺月沿山墮孤
舟背郭移伯牛嗟有疾扁鵲訪難遲十載嘉禾客悽悽感別離
送大姪云嗟爾江湖客多年曳布袍奇才誰與匹衆論易吹毛
淹滯名方盛艱難道始高吳公如可作賈誼乃吾曹幾欲留君
住其如歲已闌西風送行客一夜暮潮寒族盛離居易家貧聚
首難悽然治行李歧路忍相看別詢蕤族姪云一別毘陵道相
思直到今五年重會面兩日又分襟病以風塵久情因骨肉深
多君置樽酒歧路那能斟皆清真淒婉不減中晚唐也又野泊
云垂楊相送五茸城外寒潮滯客行黃耳冢邊舟一葉白牛
塘上月三更丁年意氣餘長劍丙夜心情付短檠靜聽高天征

鴈語亦同辛苦一聲聲又露冷園林鳥養羞及月明心肅萬松
聲五人二語亦甚妙也

僧律然字素風大河秦氏子鬢染長壽菴稱詩弟子錢圓沙之
門間住白雀寺戒行詩學隨年精進嘗書是日已過命亦隨滅
語黏座右息影齋詩沈歸愚宗伯爲之點定稱其不學儒而不
違於儒言儒行予愛其失硯行有昌黎之風後半更能於芥子
內見出須彌世界序云歲丁未製白硯一方溫潤可愛常置案
頭今誰何將去悵悒彌日既復笑一硯之失而耿耿於中若是
因作詩自解邀政夫寶洲西京東澈和焉丁未之歲重陽日故
人遺我白硯石凝脂瑩潔潤且堅一片寒光浮几席對之不覺

老眼明早晚摩挲頻洗滌急倩良工琢成硯滴露研硃伴禪寂
荒齋四壁無長物惟餘此硯等拱壁屈指相依十年久一朝失
去心難釋定教搗取換青錢未必道途空棄擲儻留市肆共傳
觀佳品定逢高眼識轉虞此硯失所遭垢膩塵埋掩光澤癡心
尙冀或重逢負鼓求亡莽追迫旋嗔念念屬塵妄妄中之妄何
時息秦廷趙璧縱復還那禁再得不再失不見玉璽與石鼓滄
桑遷徙宵難測隍中之鹿塞翁馬世事浮雲幻蒼白由來有合
必有離得也奚欣失奚戚我今賦此失硯行何殊平地叢荊棘
剪除快試智慧劍戲劇聊驅煩惱賊從茲夢覺見真空點檢衣
珠存篋積年過八十益善言懷如中秋夜懷柳南先生并堅其

約云病逢佳節成虛度自分中秋有幾番方外寒交慚我在社
中舊友只君存呼童預掃花間榻候客頻開竹下門若使不忘
老衰衲何時理棹到荒村柳南得詩果買舟至白雀寺訪之詩
固足以動人柳南風誼亦可見矣其他佳句如落葉當蒲團伴
侶皆竹石瘦將梅與匹俗賴竹爲醫滋味淡中長流光閒處緩
佳景入靜觀不覺流光逝高寒梅品格清遠鶴行藏又病馬云
飲盡清溪夜月高東谿草堂云榻臨谿水夢清虛雪夜云十分
寒重想清虛癸丑除夕云遇慣饑年不患貧東廡修復云那容
殘夢出巖扉自述云絕無來往誤疑高皆有獨到之境七絕尤
多佳者予已錄入大觀集又三峯寺云蕉鹿有無塵裏夢雲山

出沒海中漚何等空曠乙卯元旦云向耄年光祈病少忍飢心事願年豐何等溇樸

許女士在璞字玉仙適長洲陸紱臣上舍揆植爲繼妻早寡所著小丁卯集茹荼百詠梅花百詠詩文詞賦皆備父名灝字興宗邑諸生兄名進益字裕峯乾隆辛酉舉人母孫氏名淑字靜谷能文工詩訓子女課程謹嚴故玉仙自序稱非受於師襲於古采於時乃幼承先妣訓也茲錄其詠竹夫人云玉質冰姿心事空芳名誤混婦人中入幃不結紅塵夢成像全憑巧匠工百眼透明無俗障一身存節有清風高情肯爲消炎暑團扇秋捐此恨同雖少完篇而才思富有雜咏云粗識二毛羞鄭衛未諳

六律慕簫韶落花云迷豔豈因懷妒霧褪紅綠值過時天五
生辰云茹酸齧苦心常切履薄臨深念更真荷花云十里香飄
塵夢醒三竿日轉水光移又堅同碩果心含苦氣比幽蘭性不
移節概可風也

海虞詩話卷五

單學傅師白輯

鮑廣文溪字深之號慎餘官溧陽訓導年已七十矣謙冲接物質直少文錄其曉起一律云夜來微雨過早日射窗紅樹裏鳴蟬滿池邊宿鷺空夢殘移竹簟興遠問蕉箏無可今何處

謂且公

相思碧嶂中

顧布衣晟字鈍伯號耕巖以畫蘭名鄉里故汪鈞耕環贈詩有前輩風流誰比擬達生嫌瘦帶蒼肥之句詩亦清雅錄一章云平生適幽興偶爾寄毫楮對此空谷姿飄蕭恍欲舞譜作無聲詩清氣沁肝腑百卉豈不芳何如此香祖

魚處士元傅字虞巖父樗叟名翼曾撰海虞畫苑略虞巖喜藏書多手鈔善本題顧耕巖畫蘭云一種清芬沁體涼披圖偏喜墨痕香蘭蓀入畫閒情冷屈宋論交臭味長但使幽姿恆綽約何妨亂葉任頽唐溪邊桃李門前柳畢竟風神遜楚芳

章文學應麟字晉階號午泉工隸書題顧耕巖畫蘭六言云九畹韶分筆底風花雨葉縱橫對此塵消萬斛如從空谷中行

王文學大椿字八千石谷曾孫也母江苦節稍長涉筆泉湧窮巷席門有過從者一請於母母許然後見一日同館生唐八繡過訪母窺之方商略文字以古人相期乃大喜進酒食自此風雨往還無間邑中稱二八焉謁魚開封墓偕先生十世孫虞巖

云前代循良吏枯楊掩墓門高風傳半菽貧骨到諸孫已反菱
蘆稅終留疏鑿恩采樵人自禁弗使土毛翻

吳文學駿字景山號耕心家近釜山才氣富有題沈氏文境樓
引云樓於江山之間風帆沙鳥竹樹煙霞皆大塊之文也境實
生文樓以收之豐芭堂主人沈君構樓後圃枕山面江集子弟
會文斯樓顏曰文境余以預月旦間一登攬勝移情願文之不
負此境也率成四韻振衣不用上層岡百尺樓分太乙光梯穩
共登雲際路風高先得月中香排天筆陣飛鴻遠湧地文瀾活
水長放眼敢將凡境擬鳳凰鳴處是朝陽釜山亦名金鳳山故
結語云爾又中秋同人玩月云咫尺悲歡渾不一莫言千里總

同看

姚文學江字尚漁破山寺二首云杖策臨初地心游物外天雲
間觀自在梵寂聽無邊出谷一聲鳥懸崖百道泉問山何日破
長老正安禪香界愜幽尋洒然風滿林偶來參玉版入竹坐忘
深花散夕陽影山空古佛心松聲何謾謾誰識是潮音送陳杏
村公車北上云不須行李悵蕭然好向春風早著鞭斜日蹇驢
芳草路看花走馬豔陽天功名每自艱難得豪傑多因刻苦傳
極目公車爭載寶君囊只辦一青錢

周明經霖字開周號肖巖操行端方學有根柢先君子嘗游其
門久訪其詩不得偶見之舊鈔本中爰錄幽蘭一律云堂下羅

生久培根衆草先尙存眞臭味誰共賞清妍夜月寒湘女秋風
殢曉仙菲菲芳竟體空谷慨投篇蓋慰人秋試不得意之作

蘇大令汝礪字商弼號漱亭乾隆十八年拔貢知湖北遠安縣
攝荊門州又兼枝江令以儒術道民卒於官乾隆二十七年也
既卒無以殮民饋之榼榼歸路祭者互六里所著有操縵集陳
見復何二山俱稱氣韻高秀似青邱生今觀其七律誠爲定論
如夷陵冬暮云人煙雜趁巴賓集山色遙連蜀道橫新灘寓樓
云樓依絕壁雲多近木脫新霜石倍奇西陵峽云仰面雲生巖
翠失驚心雷轉峽聲來此等不勝摘也齒痛五排一首親切細
膩予年來亦苦是病因全錄之病齟經年久浮危在左車早衰

胡太迫沈痛未能紓洵以剛先傲終由蠹易疏損非甘荔實輒似沁梅諸本乏清冰擅曾無豔雪舒噉名還遜世拾慧尙羞予孰意微疴積旋教大嚼虛動搖將脫輟杌隉又連茹空說椒丸固難謀葦飲除呻吟惟拄頰瞑眩且拋書餅肉輸師服歌懷廢幼輿眉棱徒刺燈舌本亦躊躇寒水供含吐炎風困吸噓最煩三伏候兼歎二毛初志卽遊形外災猶切骨餘平生懷漱石欲礪定何如

譚大令見龍字文升號潛初乾隆九年舉人知直隸龍門縣調樂亭縣所至以慈惠廉潔稱歸田後無以自存善寫墨山水和許虹橋寒食殘梅原韻云最是今年花信晚禁煙時節有梅看

已無雪點香還冷卻爲春濃夢欲殘柳浪漫教驚玉蝶梨雲終
不掩冰紈一番風雨江城暮珍重仙姝久耐寒題顧鈍伯畫蘭
云谷裏春從研北尋素心花復遇知音光風泛處香盈室惹得
幽人欲撫琴讀之皆令人意遠

唐明經輔廷字八繡父雲啓江右人贅吾邑之孫氏晚年生子
在襁褓多驚啼母愛護之至戶樞間俱藉以綿使無聲比有知
孝思亦摯母病禱天弗應痛而啖其遺乾隆初游蜀燕走塞外
竟客死蘇園公師之故爲作傳贊曰山骨瘦於僧君詩中爲平
語耳介受茲宗伯以此得上知七主文柄桃李徧天下君竟抑
鬱以死所以深識之士甯死堀堞中不肯逢世也蜀中感事四

首云安邊使相下平蠻千騎趨迎大散關直許功名歸衛霍可
堪子弟殉河山長途傳檄旌旗變俗吏聞風汗血斑果是廟謨
勤遠略玉門飛鳥望生還征西老將放歸田詔領王師再徙邊
絕徼正逢開壘日中朝卻賀洗兵年助征回紇翻爲敵負固氏
羌別有天盛世豈容談裹革漢家故事在燕然雪嶺人行六月
寒軍容新整羽林冠糧齎萬石征輸憊馬索千羣畜牧殘切責
見收空執戟誅求無盡類探丸飛書夜到從戎去山縣蕭條少
長官蠶叢半壁故嚴疆境接諸番九坂長詎意三苗真不格卻
勞諸將久相望平沙新鬼嘯殘月空磧飢鳥叫曙霜遠戍入秋
家萬里幾多思婦怨寒螿其他諸作壯鬱皆足比此

邵舍人齊熊字方虎號松阿乾隆十二年舉人官內閣中書舍人熟於史事持論峻整鄉居之日人有作事不合法者憚爲所聞焉著有隱几山房詩鈔次杜林先生題壁原韻贈至上人云一桁青山倚翠筠山空省得是閒身濤聲欲墮松間月雲徑欣逢世外人勝處煙霞無定相靜中花木不關春禪心試看空潭影魚躍萍開總見真五六不易道也

邵太守齊然字光辰號閻谷乾隆十年庶常仕至杭州府知府書學東坡遺楮人皆寶貴同氣五人兄齊烈庶常齊燾太史齊熊孝廉弟齊熬諸生而君尤以風度勝九日法源寺看菊晚過王述菴寓齋小飲分韻得客字云涼風吹我襟草木日夜易黃

花於此時凌霜見標格閒尋古招提入門有奇獲周羅軒階前
僧意靳珠璧滿頭插未能開口笑自適秋光殊可愛爽氣侵肝
膈招攜素心人歡會旅肴核論文氣如虹射覆手屢戟慮不牽
世榮心已醉佳客厭厭且莫歸微月窺簾額詩不多作故自名
其集曰聊存草

陳大令士林字令望號杏村乾隆二十二年進士未第時嘗夢
堂中列酒壘四置棺於上以爲不祥後鄉會試聯捷謁選得貴
州甯安縣令始詫夢兆奇絕詩有集未見僅見次韻釜山沈氏
文境樓詩二首岑樓卜築倚崇岡奕奕文光接斗光鄭草常青
書借色江花不謝筆生香牙籤徧插思弘正絳帳高懸仰季長

東望扶桑應未遠願爲葵藿好傾陽月波何必羨黃岡文境爭
飛翰墨光詩酒當筵饒逸興芝蘭入座識眞香檐前魁宿輝輝
接足下雲梯冉冉長休向吾家尋百尺元龍去後屬東陽格律
高健餘可想也

范文學章承字象霖吾先子師也書學松雪嘗曰松雪自言一
日寫一萬字矍矍能三萬予可二萬客許昌幕同署驚其揮翰
迅速稱范公飛筆著有曉莊詩集學傳幼時嘗見之以晚唐爲
宗同金庭瞻家東叔過單協唐夜話四更始去云說史談經興
未降孤燈寒動影幢幢雙弓爛熳香杭米啜罷雞聲喚隔窗蓋
是時過從談文非四更不輟也餘僅記其旅懷云客路野花紅

不盡故園芳草綠應多又未工作客羞三拜每愛吟詩愧八叉
逍遙詞一卷取生平所到之地譜之皆賀新涼調雅有北宋蘊
藉之致九秋吟絕句八十一章別選入大觀集

王大令湘字楚帆號吟濤乾隆九年順天鄉舉選無錫教諭歷
知湖北宜城潛江兩縣與人交必先問有幾妾蓋放佚士也和
蘇園公題園鑑圖韻云曾披竹鑑卷烹泉量濁清今讀草堂畫
忘形誰弟兄徑荒延二仲芋熟話三生萬籟澄霜氣惟聞鳴鶴
聲詩境殊清

潘明經鎬字肇豐號芭湄又號香醉山南客嘯菴秀才孫也書
法多師以米襄陽爲歸宿句者不吝不厭授徒邑中適昭文新

造城隍廟陳廷尉桂森自書匾將懸之不愜徧索邑中能書者
爲之俱不愜始請君君欣然往日平生書不索酬既諸先輩皆
經捉筆願有以誌之一揮而就遽挾兩緡錢歡笑去今所懸作
善降祥四字是也詩好與人唱和大略喜多喜速不若書之工
矣乾元宮云暫攜雙屐上辛峯輪奐重瞻老氏宮夾鏡湖光明
眼底罨城雲影起庭中牛橫瘦石苔花繡井溢寒泉雪乳融何
事竹林偏蔓草空勞遊客話神翁中秋云此夜素娥先展鏡誰
家紅袖未憑欄有迴風流雪之態柳影云輕煙漠漠維舟興淡
月瀟瀟送客心亦佳

黃文學叔燦字金臺號收村石湖秋晚云澤國蒹葭老農鄉稼

黍秋僧歸黃葉寺鷗立白蘋洲落日寒山迴飛霞碧漢悠荒涼
文穆聖湖水到門流和題文境樓韻云文境樓高瞰野岡勢臨
霄漢燭奎光雲浮畫棟詞生藻日麗晴窗翰吐香吟對晚山煙
樹遠嘯臨秋水海天長懸知雅集多豪興好句爭傳貴洛陽有
籟鳴集亦工駢體惜詩未足選耳

吳明經大烈一名湘字晉高號春帆居白茆墅北紫霞里與許
涪鄒漪輩結吟社翛然自得罕入城市爲諸生近三十年始食
餼旋貢成均寓都門六七年醫名大著既歸仍敝門讀書吟嘯
自樂贈夏意青二首云瓶無侏儒米囊無季子金暮歸北山麓
曉對西山岑何以守固窮日月事苦吟君看松與柏自有歲寒

心孤村不成市棄置同君平故人不我棄忘形意以誠不知言
笑歡但覺酒味清飲此各努力千載恰同情庚午元旦限韻云
春催宿草動根荄人道新年雪最佳隔歲尙餘詩債務消寒惟
有醉生涯畫圖不卷山藏屋詩友頻來月入懷有約看梅攀鄧
尉趁晴先拭舊芒鞋佳句如詩貪寫意何妨淡棋怕勞心故放
低書多滿架貧還富字少撐腸飽亦飢結廬未定聊中隱涉世
無能但守雌碧梧翠竹分三徑明月清風載一航聚散十年人
易老往來萬里路偏長南枝忽訝梅先放東郭何妨履正穿登
舍利塔云長江萬里杯中瀉建業千峯掌上看以上見寄愁草
中又有虛舟吟稿

宋文學金銑字文表居唐墅罟里村劉吾村刻宋玉才願學集
後附一冊曰楚臺遺稿蓋玉才於康熙五十四年以顧姓樂名
寄籍吳江入學文表其嗣子也故吾村附刻之遊支礪山云支
公栖隱地不到十餘年花放疑無路雲開別有天樓臺圍石室
林木蔭寒泉一自宸遊後山容較昔妍頗秀潔也金陵詠古云
洛陽五馬渡江來共說琅琊濟世才游宴新亭曾下淚更衣故
主更誰哀未能戮力恢王室至竟清談釀禍胎晉祚運移渾不
省長星勸酒笑顏開意精格健不落小家伎倆又但有天花飛
講座竟無蜜水救飢囚亦佳

歸文學純仁字景范號志夫有籟鳴集春半感懷云半花半柳

半過春半被春光半惱人半酒半詩頭半白半生回首半傷神
殊有致

張少尉廷模字殿型予愛其漁父吟一篇云種竹成林作釣竿
養蠶成繭作釣絲朝朝溪邊坐磐石鬚眉照澈青玻璃苔紋磯
下細於線小魚如鍼去如箭小魚如鍼去如箭笑君空有臨淵
羨我聞東海產巨鼈大人一釣山海搖擲竿倚石感長嘯天風
浩浩波滔滔

言布衣昶字麗中居福山予見所著勝雅集稿潘芑湄序之稱
其隱於市爲成都之君平一旦邂逅容肅穆而詞溫雅隱君子
也茲錄其鴈字一章云銜荻聯翩畫碧虛深憎體格半生疏迎

風難寫徽宗信向月空摹蘇武書點點殺青還可擬行行曳白
竟何如全憑萬里雲爲楮似篆悲秋意莫舒張杏村有和麗中
五十原韻瀟灑布衣榮似錦優游筇杖適於馳并謂其蹤跡奇
祕云

鄒處士漪字棹煙號嘯軒解音律多著劇本兼精數學與許古
初潘芑洲爲友晚眺云木落洞庭晚蕭蕭滿地秋冷雲橫古寺
寒月逼江樓菊瘦還簪帽鱸肥恰上鉤平沙飛鴈下莫作稻粱
謀

鮑明經捷勛字銘山工寫花鳥以詩酒自豪而有至性方秋試
金陵聞父喪促舟歸日夜哭舵工亦爲下淚後歷遊秦豫有二

竹三水居詩草新霽郊遊云望裏孤煙起繞城一水長不分村
近遠但見色青蒼古木猶殘雨秋原正夕陽蕭然行樂去吟興
任清狂春居云風吹柔柳拂闌干殘杏枝頭怯晚寒攬鏡不知
雙鬢改十年花在故園看秋意云好夢如雲隨雨散新愁似水
逐潮生亦佳聯也

王文學陸禔字介祉古香刺史子也客維揚盧雅兩都轉待以
上客之禮贈虛七言長律百二十韻極歎賞之高宗南巡獻賦
行在未幾卒於望江縣舟次年三十三蓋家居苦交謫竟以客
死著藜石草一卷予未之見僅見詠蕪黃道中山水勝絕云流
雲裏羣峯淡暈接天碧瓣瓣玉芙蓉何年巨靈擘娟然蛾眉姿

俯仰呈施媿雜樹青濛濛高低補其隙寒江淨如鏡倒影瀉巉
石漁人四五家懸簷出沙磧平生邱壑情眷言動愉懌安得謝
塵囂誅茅卜安宅晚籟鳴蕭蕭蘋風吹挂席徑去不可留山靈
笑行役鷗鴟背人飛衝煙一行白此潘芭湄册子所錄原本多
剩語刪節存之特其少作耳

顧主事鎮字備九號虞東乾隆十九年進士官宗人府主事家
支塘其先細二翁元初被徵由上虞避地居此作詩有吾貞所
志在西山句手植紅豆於莊曾屬東澗虞東所居曰補溪草堂
著書頗多虞東學詩十二卷四庫採列經部提要略謂鎔鑄羣
言具有根柢漢學宋學能斟酌以得其平一無閒然詩亦雅健

登盤山云嵯峨千仞劍門山謝屐當年迴未攀百道泉光翻海窟三盤地勢接天關尋雲何處高人隱扶杖曾看御輦還指點衛公臨眺處劍臺零落薜花斑

趙文學貴和字孟宣號鷺洲弟貴忠字元定亦諸生嘗詠梅花三十首鷺洲次韻和之鐫板相貽茲摘一首云湖畔題詩人已非巢居高閣暮煙微殷勤願化孤山鶴趁得幽香月底歸

吳文學東材字自超居何市卽工古文名卓信之父詠宋玉云多情自古屬才人更是憐才有比鄰憔悴正逢搖落候月明牆上獨窺臣用意措辭逼肖玉溪矣雞鳴云五更茅屋風初緊一帶桑陰月正微亦繪出宵征圖也

學傳大父俊明公諱勛業醫藝花詩藥樂志安貧鄉里稱單好
人攜孫兒慶麟西谿看桃花已謝口占絕句索麗農秀才和云
扶得童孫與杖齊探春桃塢向橋西老人敢笑花輕薄錦繡文
章滿碧溪慶麟卽學傳小名時乾隆四十九年纔七歲耳大父
命默識之餘無存稿

王畫師玖字次峯號二癡石谷曾孫寫山水兼宗南北能以奇
傑變其家學爲王蘭泉寫三泖漁莊圖題云打槳入空明橫橋
出秋嶼人在釣魚汀如聞隔煙語

揚布衣景修字省三居恬莊予見其昭明讀書臺長律縱橫排
突比於老將臨戎亟錄之不盡蕭梁恨春風登古臺兩湖浮白

去一障湧青來帝子偏無祿江南信可哀塵飛壽陽騎劫燼建
康灰姬晉笙何處羸蘇劍自裁周秦參往局綱繹朕凡材選手
文章伯英姿幹濟才太清天錫祚長免雀桁開

楊孝子景崑字玉山居河陽橋侍父疾致勞瘁及母疾值盛暑
赤日中走三十里入城求醫夜不解帶閉戶蚊集則衣棉自蔽
因以峪血有詩示內云劬勞莫報病難支我卽身亡未可知縱
使哀魂戀親膝慈幃仗爾好扶持母歿哀慕遂不起年僅二十
五教諭袁秀甲題匾褒其孝行

仲文學之誥字硯園桃源澗云聞道徐洪隱此山緋桃成塢不
勝攀我來未見花千樹人去空餘水一灣烏意自因新躡樂草

痕還爲舊寒慳風流往事誰同說澗外樵歸落照殷三四殊蒼健

鮑文學岡字雲策號朝山銘山獅子少一歲耳工書畫詩詞非酒不歡常居湖田以領山水之趣故所詣尤雅憶棹煙云雙屐久不來花徑莓苔長薄霧暝前村春泉落清響好懷誰共言枯坐靜塵想不知修竹間朗然明月上次韻送王次岳金陵赴試云一路江山足浩吟馬蹏休爲客愁侵奇才競獻卞和寶豪飲誰拌孫楚金明月板橋香鬢影晚鐘蕭寺海潮音當時粉壁留題處爲問塵痕幾許深前半送王後以自憶舊游作結翻用碧紗籠事感慨遙深蒼草云但得慈親日強健小人何處不忘憂

學傳身常旅食而老母年近八旬見此爲之伊吾不置

僧龍字天翼住般若寺與陸丙嘉孝廉爲友詩殊幽暢乾隆辛卯彭啓豐序其禪餘集時龍年近五十雖尙少完篇而佳處直造古人如江上云鳥歸斜日下樹暝暮雲平送納川云浪翻鷗迹遠風逐鴈行分寶香閣云林深不著暑山靜早知秋早梅云香濃尋舊夢月冷認前身玩月云寒光涵巨浸素影弄虛明安隱云徑隨青草沒門任白雲封水中月云並觀雙鏡滿倒浸一珠明雨後云開盡花枝風滿院讀殘經卷月當樓金山云鐘聲出寺浮雲合塔影橫波落照閒山行云雲如有意當巖起鳥亦忘形隔水迎又爲惜光陰如火敢拋生死等鴻毛又豈有人

謀能化石須知天道若張弓晚歸云敗葉擁籬眠吠犬凍雲迷
樹噪棲雅晚眺云鳥影過時庭樹暝鐘聲起處野雲多皆不讓
唐代詩僧也示月江同學一首云千江共印孤圓月萬劫惟磨
一點塵何必有言爲說法祇須無我卽修真而偶成詩則云熱
心每怪常先割苦口尤嫌太易開合而觀之旣徵造詣且亦勤
於開示矣

僧聖通字貫一號拙存邑王氏子雉染長壽菴素風高弟也詩
書畫皆所指授後主持三峯清涼禪院能振宗風素風圓寂爲
刻息影齋詩鈔行世詩不多作頗堅潔桃源觀泉云飛泉百尺
下桃源最稱攜筇雨後看滾滾雲濤隨地湧層層雪浪逼人寒

半巖常洗塵埃淨一派遙通江海寬坐石細聽流水響不借煙
寺暮鐘殘春夜云暗聞花滴露閒覺月依楹

僧琛字天則少爲雲閒諸生出俗後住維摩寺能詩畫和素風
僧西齋小葺云風扶篆影空中起雲載鐘聲枕上來一時稱之